

## A NINETTA

Era na picciuttedda sicca sicca  
tutti spuntuna parianu l'ossa  
passannu tempu ora a picca a picca  
attunniau ed è fatta cchiù grossa.  
Ma pi capiri cu quali mportanza  
idda si movi chi pari na rota  
di pettu vucca natichi e di panza  
s'av'a taliari na cosa a la vota  
picci si la taliu tutta sana  
mi pari na patata amiricana.

## PASQUALI CANTA

Specialmenti s'è vili e tammurinu  
quannu qualcunu si ni va 'mpenziuni  
l'amicu nostru di nomi Pippinu  
ci fa un salutu scrittu cu paroli  
a rima d'italianu o di latinu.  
Ora chi si presenta l'occasioni  
chi s'alluntana l'amicu Pasquali  
si meritassi faricci un cenoni  
e ci scrivu cu lingua naturali  
chi sempri ha rispittatu lu so nomi  
e ha caminatu sempri tali e quali.  
Ora iddu si ni va a scacciaperi  
puru chi sempri ha pisatu un quintali  
e mmezzu a niatri sennu forestieri  
ci ha fattu anuri a li palermitani  
sempri o so postu comu ferrovieri.  
Ntrapani tempu assai cinn'ha passatu  
ha statu sulu senza so muggieri  
eppuru a so casa s'ha truvatu  
precisu e cu sensu di doveri  
ha saputu campari misuratu  
talianu giustu unni metti li peri  
e rispittannu ha statu rispittatu.  
Io l'aiu vistu sempri travagghiari  
e mai un iornu essiri malatu  
chi puru spissu lu putia fari  
si a ghiri e veniri era siddiatu  
pi putiri sirvizzu scapulari.

Caru Pasquali nun vogghiu strafari  
e anzi ora cercu d'accurzari  
ma si ancora passassiru cent'anni  
niatri putemu iri a tutti bbanni  
e sempri a pettu nfora caminari  
picchi la nostra stidda è travagghiari.  
Perciò nun c'è bisognu chi t'u dicu  
chi di tutti si sempri bonu amicu  
di chiddi antichi fatti a la manera  
chi si cantava sempri "Manuela"  
e chi si sentinu essiri chistiani:  
basta chi quannu torni o to paisi  
pi sbagliu nun t'avissiru a sparari  
e tu ci avissi a pagari li spisi,  
ora nun ti putemu cchiù scurdari  
chisti di cca semu un pugnu d'amici  
chi ti vulemu sentiri cantari  
sempri cuntentu e sempri felici.

## I... CARRITTERI

Quannu s'arriva dintra a lu Fiaturi  
a manu manca nfacci o benzinaru  
spunta un chistianu di mmezzu a li ciuri  
chi si chiama zu Vanni e fa u scarparu.  
A manu dditta prima d'a funtana,  
isannu l'occhi è sempri presenti,  
fu siminatu un peri di ficara  
chi di stasciuni fu sempri valenti.  
Ora u zu Vanni è un pocu dispiaciutu  
chi la ficara è mala cumminata  
s'ammuccava na ficu ogni minutu  
e si susia a ogni martiddata;  
doppu si caricau di risina  
e ora ci ficiru na miricata  
chi la rinchieru tutta di quacina  
e siddu passa tutta sta mmirnata  
stamu speranza chi accussì abbiva.  
Iddu sapi chi sugnu babbiatu  
quannu mi ncontra è tuttu cuntentu  
e s'avvicina chinu di primuri  
pi sentiri soccu si va dicennu;  
io ci li mpiattu tutti nuri e cruri  
e lu viu chi ogni tantu va rrirennu.  
L'aiu vistu assittatu a travagghiari  
nta la putia darrè u bancareddu  
l'aiu vistu ncampagna trafichiari  
c'un sicchiu mmanu e cu lu zzappuneddu  
e pi evitari chi putia squagghiari

s'arriparava sutta d'un cappeddu.  
Sti omini chi sunnu abbituati  
a campari pinzannu a lu travagghiu  
siddu va bona cu pani e patati  
e ci manca la stuppa e lu stuppagghiu  
sannu firriari macari scirati  
e si ni futtinu di cu sta megghiu  
accumencianu a essiri cuntati:  
si è Natali oppuru Capurannu  
s'accuntentanu di soccu è chi hannu  
li festi cu i parenti si li fannu  
pi cuntutu so senza purtari dannu.  
Ora li genti sunnu cummirista  
di nudda cosa si sannu privari  
sintimentu ci n'è sempri cchiù picca  
nun si sapi dunnì s'av'arrivari.  
E manu manu chi passanu l'anni  
la società chi ni veni davanti  
fatta di bacchittuna e di briganti  
cu testi cauri mezzi vacanti  
nun ci arraggiuna comu a lu zu Vanni,  
di sta manera lu munnu chi veni  
tuttu canciatu di chiddu d'aeri  
malu campatu sta tinutu mperi  
sulu di latri, nfami e...carritteri.

## CUMMINAZIONI!

L'annu passatu pi cogghiri funci  
ivi a Segesta doppu chi chiuviu  
pi cumpagnia avia du "seguggi"  
però lu cuntù fattu ni falliu  
picchè ni capitau la sfurtuna  
dunni chi c'era lu beni di Diu  
nun cinn'essiri affacciu mancu una.  
Successi chi ni pottimu sarvari  
picchè taliannu tutti ddi timpuna  
eranu tutti chini di burrani  
chi si putianu rinchiri vacuna  
di troffi grossi beddi nutricati  
e di gira mmezzu a li balatuna  
di terri a naturali cuncimati.  
A tempu chi cumanna la natura  
sapennu dunni si putia truvari  
pi cogghiri na botta di verdura  
puru st'annu ci vosimu arrivari.  
Truvamu maestrafi friddu e nivi  
mancu lu ciauru di li burrani  
facemu finta chi m'addivirtivi  
stesi na matinata ad aggragnari:  
li pecuri ci avianu passatu  
cumminazioni comu si va duna  
tutti cosi s'avianu puliziatu  
e lassaru... funci di struppidduna.  
Iu a finiri comu vosi Diu  
chi n'attruvamu napocu di troffi

lu zu Ciccio la gira mi cughiu  
e potti arrisciuppari quattru coffi,  
mi detti puru a biviri e mangiari  
cucciddati di ficu e cafè  
e forti chi mi ficiru addiccati  
l'annu chi veni ci vaiu arrè,  
comu mi nni putissi dispisari.?

## U PICCHI'

Vinni un alitu di vita  
e rapiu na ferita  
chi si chiuri e nun si chiuri  
ci nisceru li stornelli  
di lu focu di l'amuri.  
Foru fatti ntempu nenti  
pi nun sentiri duluri,  
ma ci n'arristaru ancora?  
Cinn'è sucu nto limuni  
chi si può tirari fora?  
Ora veni primavera  
e ci cantu li canzuni  
si lu cori ancora spera  
chi ci porta arrè l'amuri;  
ma si ncucchia acqua e focu  
e nun duna cchiù caluri  
io mi fermu e restu ddocu:  
nun ci sentu cchiù sapuri!  
Si lu cori batti lentu  
mettu puntu e mi fermu  
ma si veni l'emozioni  
chi cattigghia e chi lu smovi  
canta tutta l'allegria  
puru a forma di poesia.  
Ma ci sunnu gioi e guai  
è la vita chi babbia  
nun si può sapiri mai  
s'è lirizza o malatia.



## SEMPRI MALATA?!

Pi faricci un regalù a la Sicilia  
cu fu di bonu ci chiantau na spina  
chi è nfilata di sapiddu quannu,  
la canusciu lu nannu di me nannu.  
È ancora viva di tempu passatu  
e nuddu si ci ha misu e l'ha livatu  
cu è chi nasci si l'attrova ddocu  
è cchiù dannusa assai di acqua e focu:  
voli supra di tutti cumannari  
e fa...campari di vuccuna amari.  
Nun hannu mai scanzatu lu dammaggiu  
mancu chiddi chi avianu curaggiu  
ma ora ci su tanti rinnegati  
chi si scantanu d'essiri ammazzati  
e già caperu chi essiri "bossi"  
ci n'è assai chi morinu picciotti.  
Era di sabbatu lu primu Marzu  
dunn'eri eri sintivi davanti  
sciusciari forti un tipu di vintazzu  
mmiscatu di sciroccu e di levanti.  
Stu ventu veni picca voti l'annu  
e quannu veni porta sempri dannu  
nchiana e distruggi soccu veni prima  
pi tutti è ventu chi porta ruvina.  
Ascippa arvuli, ci rumpi i rami  
e tutti cosi abbatti e simina  
sciuscia furiusu chi ni fa scantari  
cu tanta forza chi spacca e scatina

ed è tempesta pi terra e pi mari.  
Ma sulu picchè veni raramenti  
a niatri ni porta cchiù mpresioni  
mentri parissi chi nun cunta nenti  
patiri sempri mortificazioni.  
Parissi chi ci semu abituati  
campari mmezzu a latri e scupittati  
e chi cuvannu sutta a lentu a lentu  
fannu danni cchiossai di ssu ventu.  
Quannu si sta mmezzu a lu timpurali  
si viri li disastri chi può fari:  
lu viremu e n'avissimu addisiari  
chi un jornu ni putemu allibirtari  
di sta spina fatta pi fari mali.  
Perciò Sicilia ti vulemu diri,  
tutti ti lu vulemu augurari,  
fatti curaggiu e cerca di guariri  
sta malattia fattilla passari  
stu munnu tortu fallu scumpariri  
sti tempi tristi ni li fai scurdari.

## ACEDDU STUFFU

Quann'aiu tempu di essiri sulu  
mi va mettu nta un postu all'aria aperta  
dintra la machina vicinu a un muru  
senza chi nuddu ci stona la testa.  
All'ummara mi staiu cantuniatu  
o m'addurmisciu o mi sentu la radiu  
staiu tranquillu e taliu lu tempu  
viu li genti chi vannu e chi vennu.  
L'altu jornu mi passau davanti  
un gabbianu sulu chi caminava  
a corpu si capia ch'era scuntenti  
e ia a lentu a lentu e pizzuliava.  
Doppu cchiù megghiu lu misi a taliari  
e capivi qual'era la calunia  
cu l'altri aceddi nun puia stari  
chi ala sana n'avia una sula.  
Considerati comu può campari  
un acidduzzu chi nun può campari  
e comu si putissi rallegrari  
quann'av'a fari na vita di cani;  
ci può passari ntesta di n'aceddu  
chi fussi megghiu irisinni o nfernu?  
Vicinu ci pusau na carcarazza  
chi satariava e chi facia a pazza,  
st'aceddu sarà chi è megghiu di mia  
picchè napocu cosi nun talia  
e oramai arridduccu accussi  
supporta tutti li suvicchiari.

Ma comu si può stari indifferenti  
virennu chi napocu autri aceddi  
currinu ncelu e volanu cuntenti  
e stu mischinu nun vola pi nenti?!  
Io subbitu ci fici un paragoni  
e l'aggualai a niatri inidoni  
chi 'na vota faciamu stramera  
e ora semu ittati ncurera.  
Ora n'attocca iri a tutti bbanni  
canciannu vita e canciannu cumpagni  
ognunu nun si sapi cchiù com'era  
e fa la vita di natra manera.  
Fannu na liggi chi all'ottantanovi  
siddu ch'è veru mettinu 'n penzioni  
sti puvireddi chi sunnu inidoni.  
Si semu ancora vivi e ci campamu  
la buonuscita ni l'aruzzuliamu  
e a cu è chi arresta salutamu,  
n'amentri ni livamu di sti peni  
e si ci ngumma l'ala a lu gabbianu  
forti chi vonnu livari li treni  
ni porta iddu a Castelvetranu.  
(U cchiù megghiu ci va u zu Chistianu:  
si pigghia a promozioni di viddanu  
e resta a Bruca cu u zappuni mmanu  
a priarisinni tuttu l'annu sanu.)

## FORA PAISI

Stesi a Marausa un jornu sanu  
e li muschitti vivu mi mangiaru  
a caminari ruppi un paru scarpi  
avia li carni tutti tappi tappi:  
stari a lu sulì e jucari a li bocci  
eramu cchiù fitusi di li porci.  
Mi vulia livari li surura  
acqua salata nta lu rubinettu;  
s'un fussi chi canusciu na pirsuna  
chi pi amicizia ci portu rispettu  
e calculannucci tuttu stu dannu  
m'abbasta iricci na vota l'annu.  
È un postu beddu chi nun manca nenti  
ma pi quantu è chinu di muschitti  
pi ghiricci a truvari li parenti  
a mia sta vota sula mi cci vitti  
chi fomu tutti nsemmula cuntenti.  
Pi quantu sangu chi appi sucatu  
e di mancìu chinu a tutti bbanni  
pi comu è chi sugnu spirtusatu  
spardai un tubbettu di farganni:  
pi li marausoti è dstinatu  
chiddi di ddocu attaccativi o trammi  
chi sugnu ancora tuttu rusicatu.

## COMU SONA!

Avia na chitarra vecchiarreda  
e ogni tantu pi passari tempu  
cu idda mi facia na sunatedda  
arasciu arasciu senza iri currennu.  
Me figghiu si ci misi avvicinari  
chi si vulia mparari a sunari  
e nun sapennu ancora comu fari  
cu idda ncuminciau a murritari.  
Io lu viria chi nun era cuntentu  
pi comu la facia sbattulari,  
si l'addisiava novu lu strumentu  
e chissa la mittia a matrattari.  
Perciò quannu chi giusta s'a pinzau  
ci detti un corpu e la sdirrupau  
chi accusi pi finiri la scola  
io ci accattava na chitarra nova;  
doppu mi dissi tuttu dispiaciutu,  
comu si io mi l'avissi vivutu,  
"piccatu la chitarra si rumpiu  
di supr'a seggia nterra mi cariu".  
Io la taliai comu era arriddutta  
e vitti ch'era quasi tutta rutta:  
mi prumisi di farila aggiustari  
ma nun sapia com'avia a fari.  
Doppu ci arraggiunai e a pocu a pocu  
fu accusi chi addumai lu focu  
e dintra un pignatuni chi vughia  
iu a finiri la chitarra mia.

La pigghiai ch'era tutta scuddata  
e ci detti na bedda arriparata,  
tutti li pezza rutti ci ncuddai  
e tutti li pirtusa ci attuppai  
cu codda spinguli lazza e curdeddi  
alastichi strinciuti e zagareddi.  
Nicosia ci detti n'allustrata  
e la chitarra vinni arrinfriscata,  
pi prova ci sunai na tarantella  
e doppu ch'era tutta scavigghiata  
ancora fa sunati di la bella  
megghiu chi fussi nova e mmaculata.  
Sti pezzi i lignu chi eranu rutti  
sannu sunari cchiù megghiu di tutti  
nun ci fa nenti chi su vecchiareddi  
quannu chi sunnu bon staggiunati  
nun hannu mmiria di li picciutteddi  
e fannu ancora li megghiu sunati.

Sciala Pippinu, chi ti dugnu...

## CIAURU DI CAMPAGNA

A lu paisi dunn'è chi nascivi  
si passa sempri chi si va currennu  
e mai quannu si cogghinu l'alivi  
ne quannu s'arricogghi lu furmentu  
ma sulu a tempu di munnari mennuli,  
o chi si fa lu pumaroru a pennuli,  
cu prescia d'irisinni ddittu a mari  
o a pigghiari suli o a natari.  
Cu passa chi talia nun viri nenti:  
pistari rappi dintra li parmenti  
nun viri assullivari d'u stratuni  
di purvirazzu biancu un nuvuluni  
passannu machini mmezzu addini  
e a carretti di rituna chini.  
Davant'e porti supra li cuticchi  
misi fora a lu suli ad asciugari  
strattu di pumaroru e ficusicchi  
e furmentu pi ghiri a macinari.  
E nun viri cacciari cu l'armali  
nun li viri purtari abbivirari  
e mancu quannu si facia lu pani  
davanti a focu li furna camiaru;  
ne sinapi ne centuruppa e marva  
ne pigghiari di l'arvuli la manna,



ne pagghiali cu tutta la pagghia  
supra la manciatura di la stadda.  
'Na vota u jornu dicinnovi Marzu  
pi devozioni pi pietà e pi sprazzu  
cu tavulati si facia l'ammitu  
di San Giuseppi, sempri riveritu,  
chi facennu saziari un puvireddu  
pi na jurnata l'annu era cuntentu.  
E niatri lazzaruna picciutteddi  
circavamu la spina cu lu vermi  
pi faricci la cciappula a l'aceddi,  
v'u mmagginati quant'eramu beddi!?  
E poi jucari facennu carretti  
cu pali ficurinia pparati  
e di canna spaccata li scupetti  
pi fari botti comu cannonati,  
mentri l'omini facianu panara  
di viriacioli, e corda di zzabbara,  
di giummarra li scupi e li zimmila  
fatti cu trizza e corda di curina.  
Ma la cosa cchiù bedda di taliari  
doppu chi passa lu ponti d'u Biru  
è quannu viri luntanu lu mari  
dda nfunnu chi finisci lu pinninu.  
Pittatu azzurru lu viri affacciari  
mentri chi nautru mari mmaculatu  
si fa davanti a lu viaggiaturi  
e lu paisi è tuttu profumatu  
d'un mari biancu di mennuli nciuri.  
Semu d'accordu chi lu megghiu postu  
è chiddu dunni chi ognunu nasci  
chi resta dintra di lu cori nostru  
di quannu semu misi nta li fasci.  
Però sintiti soccu aviti a fari  
chi tant'assai nun mi pozzu sbagliari:

pi Santu Vitu di jornu partiti  
chi ci truvati tuttu lu ribbellu  
e vi lavati tutti e v'arrustiti,  
vi sarvati lu suli pi lu mmernu.  
Però la sira prima di scurari  
arricampativi o Castidduzzu  
dunni chi vi putiti arripusari,  
v'arricriati e ci pruvati gustu  
vi sintiti cchiù megghiu arriscialari,  
e mentri siti pronti a lu nnumani  
putiri natra vota sbattuliari  
e cchiù cuntenti ittarivi a mari.

## U SANGU MEU

Pari chi fussiru senza sapuri  
ma sunnu veru duci di mangiari  
aranci nichì e gianni di culuri  
a talialli su cosa di ittari.  
Mi smovinu lu sangu nta li vini  
li fimmini di carnaciumi chiari  
chi su sciacquati o puru sunnu fini  
e certi voti parissiru lari  
comu l'aranci di Calatafimi  
chi sunnu megghiu di li brasiliani.

## FUNTANA SICCA

N'amicu meu di chiddi affezionati,  
chi si li leggi cu tantu piaciri  
e chiddi mei l'avi tutti sarvati,  
mi salutau pi sensu di doviri,  
chi ni ncuntramu boni di saluti,  
e poi parlannu: "mi sapissi diri  
com'è stu fattu di sta poesia  
chi ni facivi una ogni iurnata,  
accussi ti finiu sta fantasia  
di prima d'arrivari la mmimata?"  
Ci dissi: "frati meu, hai raggiuni  
veni lu friddu e si ferma lu Munnu  
s'arrifriddanu tutti li criaturi  
e tutti cosi ci dorminu ntunnu,  
la me Musa cu iddi dormi e viggia  
e quannu appena lu tempu quaria  
idda di tuttu puntu s'arruspigghia  
e nesci fora la me poesia  
chi tira o ddittu e dunni pigghia pigghia.  
Successi puru nta l'ultimi tempi  
chi tant'assai nun ci aiu cchiù tiratu  
mi l'a vulutu livari di mmenti  
ci fu calunia e l'aiu trascuratu  
pi na pirsuna chi fu pizzicata  
e a malu moru si ntisi trattata;  
pi un pizzuddu mi stesi nfunciata  
e la poesia di latu fu lassata.  
Pi ora è comu na funtana sicca

chi nun ci manna l'acqua la surgiva  
nta lu cannolu nun cinn'è na stizza  
è asciuttu comu l'ossu di l'aliva.  
Appena è tempu chi affaccia lu sulì  
squagghia lu gelu di tuttu lu mmernu  
e l'acqua scinni di li primituri  
e li surgivi si vannu rinchiennu  
e stu funtana chi nchiuri lu cori  
rinasci e l'acqua chi ci va currennu  
porta lirizza e duna tesori.  
Certu la cosa fussi malamenti  
si la funtana siccassi pi sempri,  
s'aviti la pacenza d'aspittari  
chi lu Munnu si metti arruspigghiari  
la funtana viriti funzionari  
e ni putemu la siti livari.  
Sulu un cunsigghiu vi vulissi dari  
dunn'è chi vi cummeni avvicinari:  
li fimmini com'è u so naturali  
ci ponnu iri a dinchisi i quartari,  
li masculi cercati li fiureddi  
dunni ci vivinu tutti l'aceddi.

## INDICE

- 7 Amicu Jacu
- 8 Li vigni di Peppi
- 11 Misticamenti
- 12 Lu cori canta
- 14 Musa rifarda
- 17 Eterna picciuttanza
- 18 Auguru pi Teresa
- 19 Ammitu bucolicu
- 21 Tririci botti
- 24 Comu veni la frevi
- 26 Strafuttanza
- 28 Spaventu
- 30 A miricata
- 31 Tempi chi foru
- 35 Lu sciabbicuni
- 37 Na canniledda
- 40 Cu l'occhi aperti
- 42 A turri d'a punta
- 45 Lu paiseddu
- 48 La mala Pasqua
- 51 Tu chi coci
- 52 Palummedda
- 54 U vecchiu e u novu
- 56 U varagnu
- 58 Musica surda
- 60 Autu vasciu
- 62 Chi siti!
- 65 Poetari

- 67 Spitali
- 68 'Mpupata
- 69 A Ninetta
- 70 Pasquali canta
- 72 I... Carritteri
- 74 Cumminazioni!
- 76 U picchi
- 77 Sempri malata?!
- 79 Aceddu stuffu
- 81 Fora paisi
- 82 Comu sona!
- 84 Ciauru di campagna
- 87 U sangu meu
- 88 Funtana sicca

Fotocomposizione e stampa

INDUSTRIA GRAFICA  L. SARCUTO s.r.l.

C.da S. Giusippuzzu, 106 - Tel. 0922/72104-72024

AGRIGENTO

Finito di stampare nel mese di settembre 1986



